



*Iesus est baptizé au fleuve du Iordain : la voix du Pere est oüye :
le Sainct Esprit descend sur luy.*

PRES que Iean eut fait deuoir par ses exhortations, d'amener les hommes à repentance, & que ceux de Ierusalem, de Iudée, & des contrées qui estoient à l'enuiron du Iordain, furent baptizez au Iordain, confessans leurs pechez, Iesus aussi vint de Nazareth ville de Galilée, au fleuve du Iordain pour estre baptisé de luy: Mais Iean s'y opposoit & luy resistoit humblement, disant: l'ay besoin d'estre baptisé de toy, Seigneur; & Iesus luy repondant, luy dit; Laisse faire, & permets cecy maintenant, car il nous conuient ainsi accomplir toute iustice; lors il le permit. Et quand Iesus fut baptisé il monta hors de l'eau, & se mit la en oraison. Et comme il prioit, voilà les Cieux qui furent ouuerts, & Iean veit venir sur luy l'Esprit de Dieu, & descendre comme vne Colombe. Vne voix aussi fut oüye du Ciel, disant: Cettuy-cy est mon Fils bien aymé auquel ie me suis bien pleu; & alors Iesus-Christ commença à atteindre l'âge de trente ans. Luy qui fut fils, comme on l'estimoit de Ioseph, qui fut fils d'Heli, qui fut fils de Mathat, qui fut fils de Leui, qui fut fils de Melchi, qui fut fils de Ianné, qui fut fils de Ioseph, &c.

S. Matthieu 3. Chap. S. Luc 3. Chap. S. Marc 1. Chap.